

# Tjukurrpa Ngaanya Tjatjuwalu-tjananya Katirrayintja Mawutjanya Mirrirrinyangka

*Mama Kuurrnga Tjatjuwala Wangkarranytja*

<sup>1</sup> Nyangka Mawutjanya mirriringu. Tjiinya Mawutjalu Mama Kuurrku waarka palyarawanarayintja. Nyangka wati yini Tjatjuwalu-lu yirringkankupayi. Nyangka Mawutjanya mirriringka Mama Kuurrtu Tjatjuwala watjarnu,

<sup>2</sup> “Yuwa, nyuntulu-tjananyan Yitjurayilku tjamupirti walara kutikatiku tjiinyamarntu Mawutjanya wiyarringkunyangka. Nyangkayan pakara kutipitjaku kapi Tjuutannga kantura wayirntanku ngurra nyarra kalkurnu wantitjala tjarrpaku.

<sup>3</sup> Ngurra kutjupa-kutjupakutu-yan yankulanyangka ngurra palunyanya-tjanamparnanku nintilku.

<sup>4</sup> Manta lipi purlkanya-tjanamparnanku nintilku. Nyangka-yan ngurra palunyangka tjarrarringkula ma-nyinarra-wananma.”

<sup>5</sup> Nyangka Mama Kuurrtu-lu tirtu watjara wanarayintja, “Yuwa Tjatjuwa, kulila-rni. Ngamulurtu-rnanta miranykanyira katirrayinma. Tjiinya-rna Mawutjanya miranykanyira katirrayintja, palunyapirinypartu. Nyangka nyuntulu-tjananyan yanyan-yanyanpa nyinapayi

*pirninya pungkula-wanarayilku wiyalu.  
Tjiinyamarntu-rnanta ngayulu wantikitjamunu  
tirtu miranykanyinma.*

<sup>6</sup> *Ngurlurringkutjamaalpa rapa nyinama.  
Nyuntulu-tjananyan yarnangu pirninya walara  
katirrayilku ma-tjarrpatjunku ngurra nyarra  
kalkurnu wantitjala.*

<sup>7</sup> *Ngurlurringkutjamaalpa rapa nyinama.  
Palunyalu wangka pirninyartu nyarra  
Mawutjalunta nintipungu wantitjanya  
watarrkurrinytjamaaltu wangarnarralu kulira  
palyanma.*

<sup>8</sup> *Yuwa, tirtu nyakula watjanma ngayuku  
wangka ruulangka ngaralanjtjanya. Palunyalu  
karlarla mungangka tirtu kulinma. Palun-  
yalu wangarnarralu kulira palyanma. Nyangka-  
rnanta walykumunura kanyinma. Nyangkanta  
kutjupalu walykulkitjamunu.*

<sup>9</sup> *Yuwa, ngurlurringkutjamaalpa rapa nyinama.  
Tjiinya ngayunya-rnanta Mama Kuurrnga mi-  
ranykurru tirtu pitjalayinma ngurra kutjupa-  
kutjupakutun yankulanyangka.”*

### *Tjatjuwalu-tjananya Watjarnu Yurrara-yanku Tamarlmankutjaku*

<sup>10-11</sup> *Nyangka Tjatjuwalu watjarnu liita pirniluya ngurrawanalu yarnangu pirninya-tjananya ngaapirinypa watjaltjaku, “Ngurra kutjarratjanulan pakara mapitjaku kapi Tjuutanta yitipirringkulalpi ngurra tjunku ngurra nyarra Mama Kuurrtu kalkurnu wantitjala. Mirka pirniyanku yurraralpi tjurra yalatjarringkula kutipitjakitjalu.” Nyangka-ya liita pirnilu mularrpartu*

*yarnangu pirninya parrawatjarnu. Nyangka-ya kuliralpi mirrka, warntutarrartu karrpirnu tjunu.*

## 2

### *Tjatjuwalu-pulanya Wati Kutjarra Witurnu Parranyakutjaku-pula*

<sup>1</sup> *Kapi Tjuutanta kakarrara-ya nyinarranytja. Nyangka Tjatjuwalu wati kutjarra miratjuralpi watjarnu, “Yuwa, yarra-pula ngurra Tjarikalawana wiyapirinytju parranyawa, ‘Nyaapirinypa ngurra ngarala? Yarnangu-ya nyaapirinypa nyinarra?’”*

Nyangka-pula mularrpartu yanu Tjarikalakutu ngamuntirringu. Palunyalu-pula yiwarlakuturingkulalpi nyangu minyma kutju ngaralanatyja. Nyangka-pula tjapirnu ngurra ngarrikitjalu. Nyangka-pulanya palunyaku yiwarlangka tjarrpatjunu.

<sup>2</sup> *Nyangka wati kutjulu-pulanya nyangu. Palunyalu yanu puurrrpa purlkanyangka tjakultjunu, “Wati kutjarra-pula Yitjurayilku wartangkatja kuwarrinya tjarrpangu wiyapirinytju-pula parranyakula yankula tjakultjunkukitjalu.”*

<sup>3-7</sup> *Nyangka kuliralpi warrmarla-tjananya witurnu minyma nyarra Rayipaku ngurrangka wati kutjarranya tjulyara katitjaku.*

Nyangka tjiinya Rayipalu kurranayulipi wati kutjarranya watjarnu, “Tatila-pula yiwarla katu ngarrikati. Nyangka-pulanyaarnanta tjutula warta nyarlpi pikitjarrangka.” Nyangka-pula mularrpartu tatiralpi ngarrirranytja.

*Nyangka-ya warrmarlalu pitjangu watjarnu, "Wati kutjarranya yarltirra kati, nyarra kuwarrinya-pula pitjangu ngurra nyakukitja."*

*Nyangka Rayipalu watjarnu, "Wiya, karrangka-pula yanu kayirrpaa kuwarripa yarla ngaralanyangka. Ngurra kutjupakutu-tjinguru-pula yanu. Ngurrpa-rna." Palunyalu-tjananya watjarnu, "Waarrpuwa-ya ngurlura wanala ngamuntirriralpi nyawa."*

*Nyangka-ya mularrpartu kayirrwanalu ngurlura wanarnu. Nyangka-ya kayirrpaa miranykanyilpayilu yangatjunu. Nyangka-ya warrmarla pirniliu kunpu-kunpu ngurlura wanarayirnu kapi Tjuutanta wantirra marlaku pitjangu.*

### *Rayipalu Tjapirnu Miranykanyiltjaku-luya*

<sup>8</sup> *Nyangka Rayipanya palunyaku yiwarlangka tjarrparralpi tattirnu nyangu wati palunyanya-pula kunkunarrinytjamaalpa tirtu wanka nyinarranyangka.*

<sup>9</sup> *Palunyalu watjarnu, "Nintilu-rna kulira tjiinya Mama Kuurrtu-tjanampanku ngurra ngaanya nintilku. Nyangka-latju pirninyartu ngurlu-ngurlu nyinarra.*

<sup>10</sup> *Tjiinya-latju tjukurrpa kulirnu Mama Kuurrtu kapi Tjtitirn-tjtitirnnga tikirlmanu tjiinya nyuntulu-yan Yiitjipunya wantirra pitjanyangka. Palunyatjanu-latju tjukurrpa kulirnu tjiinya-yan kuwarri-kuwarri puurrpa kutjarra pungu mirrirntankunyangka.*

<sup>11</sup> *Tjiinya-latju kulirnu ngurlurringu. Tjiinya-latju nintilu kulira Mama Kuurrnga tjiinya-yan pupakatirra marninypungkula, palunyalu manta yilkari puurrarringkula kanyira. Nyangkalampatju wuyurpa wiyarringu. Tjiinya-latju pikakitjamunu.*

<sup>12</sup> *Nyangka-pularni ngaanya watjala wanti Mama Kuurrta mirangka tjiinya-pulan ngarltunytjulu-lanyatju kanyilkitalu, ngayuku mama, ngunytju, kurta, marlanypiritarrartu. Tjiinya ngayulu-pulanyarnanta miranykanyira kanyira, palunyapirinypa. Watjala-pularni yutilurtu wanti wankarura kanyilkitalu.*

<sup>13</sup> *Ngayuku yungarrapirti-lanyatju miranykanyira kanyinma. Miranykanyinma-lanyatju mirriritjakutarrartu-latju.”*

<sup>14</sup> *Nyangka wati kutjarralu-pula watjarnu, “Yuwa, miranykanyilku-litjunta. Tjiinya-tjingurun kutjupangka watjantjamaaltu wantiku. Nyangkalitjunta miranykanyira kanyinma Mama Kuurrtulampatju ngurra ngaanya nintinnyangka.”*

### *Wati Kutjarranya-pula Marlaku Yanu Ngur-raku*

<sup>15</sup> *Tjiinya yaarrpa purlkanya walutjarralu yi-warla pirninyartu parrayangatjura kanyiranytja. Yaarrpa palunyanya wirrmira mularrpa ngar-alanytja. Nyangka Rayipaku ngurra katu ngar-alanytja yaarrpa palunyawanartu. Nyangka Rayipalu purturru wirrmira dintanguru warningu. Ka wati kutjarralu-pula witurrpungkulalpi tjarn-garangu.*

<sup>16</sup> Nyangka Rayipalu watjarnu, "Waarrpungkula-pula yapukutu kukurraala kumpiralpi nyinama ngurriltjakutarrartu. Tjinguru-ya purtu ngurrirayilku ngurra kutjarratjanu marlaku pitjaku. Nyangkalta-pulan pakara yanku ngurrakutu."

<sup>17</sup> Nyangka-pula watjarnu, "Ngaanya-litju tjurkurltu watjara. Miranykanyilku-litjunta watjarnu wantitjatjanulu.

<sup>18</sup> Nyangkan nyuntulu ngaapirinypa palyalku. Nyinarrayilkun nyaku warrmarlarringkula-latju pitjanyangka. Palunyalun purturru tjitirn-tjitirnpa ngaanya wintangka karrpilku wantiku. Palunyalunku yungarrapirti-tjananya yarlirra kati nyuntuku yiwarlangka tjarrpatjurra kanyinma. Nyangka-latju pitjaku nyaku purturru wintanguru waraly-waralyngaralanyangka. Palunyalu-latjunta wankarunku.

<sup>19</sup> Yuwa, Mama Kuurrtu-linyatju palya kunkanymanku yarnangu kutjupanya nyuntuku yungarra mirrirrinyangka. Nyangka-tjinguru kutjupa nyuntuku ngurra wantirra pakara yanku parrangarama yilkaku. Nyangka-latju kamu miranykanyilku.

<sup>20</sup> Nyangka-tjinguru-linyatjun ngayunyatjarra watjalku. Nyangka-litju miranykanyintjamaaltu wantiku. Nyangka-yan mirrirriku."

<sup>21</sup> Nyangka minyma palunyalu palyarnmaralpi witurnu. Nyangka-pula yanu. Nyangka minyma palunyalu purturru tjitirn-tjitirnpa wintangka karrpirnu wantingu.

<sup>22</sup> Nyangka-pula yanu yapungka kumpirnu nyinarranytja. Nyangka warrmarla pirnilu-

*pulampaya yiwarrawana parrangurriranytja. Palunyalu-ya purtu ngurrirayirnu ngurra kutjarratjanulu wantirra marlaku pitjangu yiwarlakutu.*

<sup>23</sup> *Nyangka-pula wati kutjarranya yapunguru tjarungarala mapitjalayirnu kapingga tjarrparra ma-katurringu. Palunyalu marlaku ngurrakutu parrapitjangu. Palunyatjanulu-pula tjukurrrpa tjakultjunu Tjatjuwala.*

<sup>24</sup> *Palunyalu-pula watjarnu, "Mularrrpa-lampa Mama Kuurrtu manta lipinyartu nintirnu. Nyangka yarnangu pirninyartu-lampaya ngurlu-ngeurlu nyinarra."*

### 3

#### *Yitjurayilku Tjamupirti-ya Kapi Tjuutanta Yitipirringu*

<sup>1</sup> *Nyangka munga-mungangka-ya Tjatjuwalu puru Yitjurayilku tjamupirtiлю pakaralpi-yanku warntu karrpi-karrpirnu. Palunyatjanu-ya ngurra wantirra mapitjalayirnu kapi kantilykutu. Palunyalu-ya ngurra tjunkulalpi kuwarripa nyinarranytja yitipirrikitja kutjupa kantilykutu.*

<sup>2</sup> *Nyangka ngurra kutjarratjanulu-ya liita pirnilu pakaralpi*

<sup>3</sup> *yarnangu pirninya-tjananya parrawatjarnu, "Tjiinya-yan nyaku wati nyarra tiinti miirl-miirlta waarkarringkupayilu-ya puuka miirl-miirlpa makatirrayinnyangka pakaralpi-yan wanalku.*

<sup>4</sup> *Nyangka-tjananyantaya nintitjunku mapitjalayiltjaku-yan. Tjiinya-yan ngurra nyarraku ngurrrpa, kuwarrinyakutju pitjangu.*

*Nyangka-kurlu-yan puuka miirl-miirlku ngamurringku. Tiwawanalu-ya nyakula wanarayinma.”*

<sup>5</sup> *Nyangka Tjatjuwalu-tjananya yarnangu pirninya watjarnu, “Tjurrkurlarri-yanku Mama Kuurrtu. Palunyalu tamarlpa nyina. Tjiinya-lan nyaku Mama Kuurrtu yayirninytjulu kutjupa-kutjupa palyaranyangka.”*

<sup>6</sup> *Nyangka Tjatjuwalu-tjananya watjarnu wati nyarra tünti miirl-miirlta waarkarringkupayilu-ya puuka miirl-miirlpa tjarlira kurranlyulu katir-rayiltjaku. Nyangka-ya mularrpartu tjarlira mapakarnu.*

<sup>7</sup> *Nyangka Mama Kuurrtu-lu Tjatjuwala watjarnu, “Kuwarrinya-tjananyarna yarnangu pirninya nintitjunku tjiinya nyuntunyan liita mula-mula nyinarranyangka. Nyangkanta-ya nyangama tjiinya-rnanta yirringkaranyangka, tjiinya-rna Mawutjanya yirringkara kanyilpayi, palunyapirinypa.*

<sup>8</sup> *Yuwa, watjala-tjananya wati nyarra puuka miirl-miirltjarra mapitjalayirni. Nyangka-yayi kapinkga ma-tjarrparralpi ngara.”*

<sup>9</sup> *Nyangka Tjatjuwalu-tjananya yarnangu pirninya watjarnu,*

<sup>10</sup> *“Yuwa, yarnangu kutjupa-kutjupa pirni-ya kapinkga munkarra nyinarra. Nyangka Mama Kuurrtu-tjananyanta yirringkanama. Nyangkalta-yan pungku wiyaliku. Tjiinya-tjanampa tjukurrtatjalu-tjananya wankara kanyilkitjamunu. Nyangka Mama Kuurrtu-lanya wankara kanyinma. Nyangka-yan nyaku mula-mularriku.*

<sup>11-13</sup> Yuwa, Mama Kuurrnga puurrpa purlkanya manta lipikurtu. Nyangka-ya palunyaku puuka miirl-miirlpa nyakuma. Nyangka-ya wati nyarra puuka miirl-miirlpa katirrayintjanya ma-tjarrpaku kapingka. Nyangka Mama Kuurrtu kapi kukurrmaranytjanya marrkulku. Nyangka mawurntalarringkulalpi ma-ngarrima yurrimaalpa yapu warrarapirinypa."

<sup>14</sup> Nyangka-ya mularrpartu yarnangu pirlnu ngurra palunyanya wantirra paka-pakarnu. Nyangka-ya wati nyarra puuka miirl-miirlpa katirrayintjanya kurraryurringu

<sup>15</sup> kapikutu. Nyangka kapi warnanpa katu mularrpa kukurrmaranytja karrungka. Nyangka wati-ya nyarra kurraryu mapitjalayintjanya kapingka tjarrparralpi ngarangu.

<sup>16-17</sup> Nyangka kapi ngatalarringu tiwa ma-ngarrirranytja. Kapi nyarra Yuru Kumpuwalykukutu kukurrmaranytjanya ngatalarringu ma-ngarrirranytja. Nyangka kapi ngarringu wantinyangka manta tikirlarringu. Nyangka-ya yarnangu pirlnya waarrpungkula yitipirringkula yanu manta tikirlwana. Nyangka-ya wati nyarra puuka miirl-miirltjarranya karrungka ngururrkutjarra ngaralayirnu, nyangka-ya yarnangu pirlnyartu yitipirringyangka-ya pakara yitipirringu.

## 5

### Puurrpa Pirni-ya Ngurlurringu

<sup>1</sup> Nyangka-ya puurrpa pirni ngurra yitipi-yitipingkatjalu kulirnu tjiinya Mama Kuurrtu

*warnanpa purlkanya marrkurnu kanyiranytja, nyangka-ya Yitjurayilku tjamupirtlu karruwana yitipirringkula pitjangu. Kuliralpi-ya ngurlunyngurlunyarringu. Palunyatjanu-ya pikakitjalu kulirnu wantingu.*

*Kuka Tjiipu-ya Ngalangu Yara Wayirntankut-janya Yarrkalpungu*

<sup>10</sup> *Nyangka Yitjurayilku tjamupirti-ya ngurra yini Kilkalta nyinarranytja tjiiinya Tjarikala kakarrara. Nyinarrayirnu-ya tjirntu 14-tjanulu mungarringkulalpi tjiipu warlangu pungkula ngalkulanytja. Tjiinya-ya Yara Wayirntankutjanya yarrkalpungu nyarra kutjulpirtu-ya tjiipu pungu ngalangu Yiitjipunya wantikitjalu, palunyapirinymanu-ya.*

<sup>11</sup> *Ngarringu tjirnturringkulalpi-ya mirrka yurninypa ngurrangkatja yurrara ngalkulanytja. Yurninypa kutjupatjarra-ya paara ngalkulanytja. Palunyatjanulu-ya yurninypa kutjupatjarranya rungkara nyumatjunkula paara ngalkulanytja.*

<sup>12</sup> *Nyangka tjirntu palunyangkartu mirrka mana tjiiinya yilkaringuru punka-punkalpayi wi-yarringu. Nyangka palunyangururtu-ya mirrka ngurrangkatja ngalkulanytja ngurra kalkurnu wantijtala.*

*Tjatjuwalu Nyangu Wati Kutju Kunmarnu Purlkatjarra Ngaralanyangka*

<sup>13</sup> *Nyangka Tjatjuwanya yiwarla nyarra Tjarikala ngamu parrangaralanytja. Palunyalu tjulurraarnu nyangu wati kutjulu kunmarnu purlkanya yilarunu kanyiranyangka. Nyangka Tjatjuwanya mapitjangu-lu ngamurringkulalpi*

*tjapirnu, “Ngayunya-munta-lanyatjun yirringkankukitja ngarala? Wiya-tjingurun kutjupatjarranya-tjananyan yirringkankukitja ngarala.”*

<sup>14</sup> Nyangka wati palunyalu watjarnu, “Wiya, ngayulu-rna warrmarla yilkaringkatjaku puur-*rp*a.”

Nyangka Tjatjuwanya mantangka pupakatirralpi watjarnu, “Yuwa, watjala-rni. Nyaapirinypa-rnanku palyalku?”

<sup>15</sup> Nyangka wati palunyalu watjarnu, “Tjinapu-unpanku yarrala. Tjiinyan manta miirl-miirlta ngarala.” Nyangka mularrpartu tjinapuunpa yarrarnu tjunu.

## 6

### *Mama Kuurrtu Tjarikaku Yaarrpa Purlkanya Purlparrpungu*

<sup>1</sup> Nyangka tawunpa Tjarikanya yaarrpa purlkanyangka kaninytjarra puparranytja, yapi walu purlkanyangka palyarnu wantinyangka. Nyangka-ya yarnangu yiwarlangkatja pirninya ngurluny-ngurlunypa nyinarranytja. Palunyaluya kayirrpa lakapungkula wantipayi. Nyangka kutjupa tjarrparranytjamunu. Puru-ya pakara yilkaku ngaralanytjamunu.

<sup>2</sup> Nyangka Mama Kuurrtu Tjatjuwala watjarnu, “Yuwa, ngayulu-tjananyarnanta yirringkanku. Nyangka-yan yarnangu pirninya ngurra ngaangkatja pungkula-wanarayilku wiyalku.

<sup>3-4</sup> Tjiinya-yan ngaapirinypa palyalku. Nyuntulun warrmarla pirnitjarra mapitjaku

yiwarlakutu. Nyangka wati nyarra tiinti miirl-miirlta palyalpayi 7-pa-ya turampirrtjarra-turampirrtjarra kurranyurringkula mapitjaku. Nyangka-ya wati puuka miirl-miirltjarra marlawana mapitjaku. Nyangka-yan yaarrpa yilkakuwana wanaparri-wanaparri parrapit-jalayilku marlakurringkula ngurrakutu pitjama. Palunyalu-yan ngarriku tjirnturringkulalpi puru palunyapirinypa parrapitjaku. Palunyapirinypa-yan tjirntu kutjupa tjirntu parrapitjaku. Palunyalu-yan ngurra 6-tjanu pakalku mapitjaku parrapitjaku-parrapitjaku 7-arriku. Nyangka-ya wati nyarra turampirrtjarralu tirtu mirratjingarayinma.

<sup>5</sup> Nyangkalta-yan pirninyartu lingkIRRpa mirraku. Nyangkalta yaarrpa walutjarra palunyanya purlparraalku. Nyangkalta-yan warrmarla pirninya ma-tjarrpaku."

<sup>6</sup> Nyangka mularrpartu Tjatjuwalu-tjananya wati nyarra tiinti miirl-miirlta waarkarringku-payinya yarlirralpi watjarnu, "Puuka miirl-miirlnga-yan mantjira katiku. Nyangka-ya wati 7-pa turampirrtjarranya kurranyu mapitjaku."

<sup>7-10</sup> Nyangka Tjatjuwalu-tjananya warrmarla pirninya watjarnu, "Mapitjaku-yan yaarrpa yilkakuwana puriny-purinypa parrapitjaku. Palunyatjanu-yan ngurraku marlaku pitjaku. Tjiinya kutjupatjarra-ya kurranyu yanku. Nyangka-ya puuka miirl-miirltjarra marlawana yanku. Nyangka kutjupatjarralu-yan purinytju marlawanalu wanarayinma. Kanmarrpa-ya parrapitjala pitja. Nyangka ngula ngayulu-rna watjannyangka-yan mirraku."

*Nyangka-ya mularrpartu palunyapirinypa parrapitjalayintja. Tjiinya-ya warrmarla marnkurr-marnkurrpa kurranayurringu. Nyangka-ya wati nyarra turampirrtjarralu mamarriatjingara mapitjalayintja. Nyangka-ya wati nyarra puuka miirl-miirltjarralu wanarayintja. Nyangka-ya warrmarla kutjupatjarralu marlawanalu wanarayintja.*

**11** *Tjiinya-ya puuka miirl-miirlpa parrakatir-rayirnu marlaku pitjangu Tjatjuwalu watjannyangka. Palunyalulta-ya ngurraku marlaku pitjangu ngarringu tjirnturringu.*

**12-14** *Nyangka Tjatjuwanya mungamungangka pakaralpi-tjananya watjarnu, "Palunyapirinypartya puru yiwarlawana parrapitjala ngurraku marlaku pitja." Nyangka mularrpartu-ya wati nyarra tiinti mürl-miirlta waarka palyalpayi puru warrmarla pirninya palunyapirinypartya parrapitjalayintja. Palunyatjanu-ya marlaku ngurraku pitjangu. Tjurntu kutjupa tjurntu-ya kutjuwarra parrapitjala ngurraku marlaku pitjangu.*

**15** *Nyangkalta-ya ngurra 6-tjanu tjurntu kutjupangka mungayurntura pakaralpi mapitjangu yiwarlawana parrapitjangu yara palunyapirinypartya. Palunyalu-ya palunyapirinypartya puru 6-nguru parrapitjangu.*

**16-19** *Nyangka-ya wati nyarra turampirrtjarralu puulkitjangka Tjatjuwalu-tjananya yarnangu pirninya watjarnu, "Yuwa, Mama Kuurrtulanya yirringkanku. Nyangka-lan ngurra ngaangkatja yarnangu pirninyartu pungkulayilku mirrirntanku palunyalu kutjupa-kutjupa*

*pirninya-tjanampa wiyalku. Palunyatjanulan minyma Rayipanyakutju wanka kanyilku, tjiiinya wati kutjarranya-pulanya kumpitjunu kanyirnu, palunyangka. Nyangka-ya kutjupakutjupa nyakula pampuntjamaaltu wanti. Tjiinya kutjupalu kutjupa-kutjupa pampuralpi-larya kunkanymanku. Nyangka-yan kawurlpa, tjilpa, puru yayinpa nyakulalpi mawurntalpa watitjurra wanti. Tjiinya Mama Kuurrku-ra. Yuwa, mirraya.”*

<sup>20-21</sup> *Nyangka-ya wati nyarra turampirrtjarralu mirratjingarnu. Nyangka-ya warrmarla lingkirrpa mirrangu. Nyangkalta yaarrpa purlkanyanya yungarra purlparraarnu. Palunyangkalta-ya makukurraarnu yiwarlangka tjarrparralpi kunmarnu purlkanyangka-tjananya wakarayirnu-wakarayirnu mirrirntanu. Nyangka-ya wati, minyma, tjilku pirninyatarrartu mirrirringu wiyarringu. Nyangka-ya puluka, tjiipu puru tungki pirninyartu mirrirringu wiyarringu.*

<sup>22</sup> *Nyangka Tjatjuwalu wati nyarra parranyaku-payi kutjarranya witurnu, “Yarra-pula minyma Rayipanya nyawa. Palunyaku yungarrapirti yarlirra kati tjiinya-pulan watjarnu wantitjatjanulu.”*

<sup>23</sup> *Nyangka-pula mularrpartu Rayipaku yiwarlangka tjarrpangu-tjananya yarningu pirninya yarlirra katingu. Palunyalu-tjananya nyinatjunu Yitjurayilku tjamupirtiku ngurrangka ngamu.*

<sup>24</sup> *Nyangka-ya warrmarla pirnilu yiwarla palunyanya tilirnu tjarrpatjunu. Nyangka mantakutju ngaralanytja. Nyangka-ya kawurlpa,*

tjilpa, yayinpatarrartu yurrara katingu mawurntalpa tjunu Mama Kuurru.

<sup>25</sup> Tjiinya Rayipanya puru palunyaku yungarrapirtikutju wankarringu nyinarranytja. Tjiinyamarntu wati kutjarranya kumpitjunu kanyiranytja, palunyangka Tjatjuwalu-tjananya wanka kanyiranytja. Nyangka-ya palunyaku tjamu kaparlipirti ngurra Yitjurayilta tirtu nyinarra kuwarrinya-rna tjukurrrpa ngaanya walkatjuru yangka.

<sup>26</sup> Nyangka Tjatjuwalu-tjananya yarnangu pirninya ngaapirinypa watjarnu ngurlutjunu, "Yiwarla ngaanya-kurlu-yan marlakulu palyalku. Wanti. Tjinguru kutjupalu yiwarla ngaanya marlakulu palyalku. Nyangka Mama Kuurrtulu yinitjunku. Nyangka-ra palunyaku katja tirnanya puru marlangkatjanya mirrirringku, tjiinyamarntu yiwarla palunyanya marlakulu palyannyangka."

<sup>27</sup> Yuwa, Mama Kuurrtu Tjatjuwanya tirtu yirringkaranytja. Nyangka-ya yarnangu pirni ngurra lipingkatjalu tjukurrrpa palunyatjarra kularpi watjaranytja tjiinya wati purlkanyanyu.

## 7

### Warrmarla Yayinyamartatjilu-tjananya Ngurlura Wanarnu

<sup>1</sup> Nyangka tjiinya Mama Kuurrtu-tjananya watjarnu kutjupa-kutjupa Tjarikanyamartatji-ya mantjintjamaaltu wantitjaku. Nyangka wati kutju yini Yayikantu tungun-tungunarringkulalpi kutjupa-kutjupa yurrara katingu. Nyangka

*Mama Kuurrnga-tjanampa Yitjurayilku tjamupir-tiku mirrparnarringu.*

<sup>2</sup> Nyangka-ya Tjarikala ngamu ngurrangka nyinarranytja. Nyangka Tjatjuwala wati-tjananya witurnu yiwarla yini Yayinya mapitjala paranyakula pitjala watjaltjaku. Nyangka-ya mularrrpartu yanu parranyakulanytja.

<sup>3</sup> Palunyalu-ya marlakulu pitjangu Tjatjuwala watjarnu, "Wiya, pirnimunu-ya. Warrmarla marnkurr-marnkurrpa witula, tjinguru 3,000-pa."

<sup>4-5</sup> Nyangka mularrrpartu Tjatjuwalu-tjananya warrmarla 3,000-pa witurnu. Nyangka-ya mularrrpartu yanu mirri pungkukitja. Nyangka-ya wati Yayinyamartatjilu pakara-tjananya ngurlura kukurrtjingara wanarayirnu wantingu. Wati 36-pa-tjananyaya pungu mirrirntanu. Palunyalu kutjupatjarranya-tjananya kukurrtjingara wanarayirnu mawantingu. Nyangka-ya warrmarla Yitjurayilku wartangkatja ngurlu-ngurlurringkula wantirra pitjanytja. Nyangka-ya yarnangu pirninyatarrartu ngurlu-ngurlurringu.

<sup>6</sup> Nyangka-ya Tjatjuwanya puru liita pirninya tjurlpilyarryingu. Palunyalu-ya yanu Mama Kuurruku puuka miirl-miirlpangka pupakatirralpi puparrayirnu tjirntu tjarrpatjunu.

<sup>7</sup> Nyangka Tjatjuwalu Mama Kuurrta watjarnu, "Wiya Mama, nyaatjanu-lanyatjun katingu ngurra ngaaku? Wiya, ngurra ngaangkatjalulanyatju pungku mirrirntanku wiyaliku. Tjingurulatju ma-nyinama kapi Tjuutanta kakarrara.

<sup>8</sup> Wiya Mama, purtu-rna kulira watjalkitjalu. Tjiinya ngayuku warrmarlalu-tjananyaya purtu pungkula ngurlu kukurraarnu.

<sup>9</sup> Nyangka-ya *yarnangu kutjupatjarralu kuliralpi-lanyatju pitjaku parrayangatjunkulalpi pungku mirrirntanku.* Tjiinya-ya *watjalku nyuntulu-lanyatjun pertu yirringkaranytja.*"

### *Mama Kuurrnga Mirrparnarringu Mulyatar-rinyangka*

<sup>10</sup> Nyangka Mama Kuurrtu Tjatjuwanya *wat-jarnu*, "Nyaakun mantangka ngarrirra? Pakala.

<sup>11</sup> Tjiinya Yitjurayilku *tjamupirti-ya tungutungunarringu.* Watjarnu-rna *kutjupa-kutjupa Tjarikanyamartatji-ya pampuntjamaaltu tililtjaku.* Nyangka-ya *kutjupa-kutjupa tungutunguntu mulyatarringsu.* Palunyalu-ya *mayuralpi kumpitjunu kanyiranytja.*

<sup>12</sup> Tjiinya *palunyangurungka-ya warrmarla nyarranya nyakula ngurlu kukurraarnu.* Wiya, *kunkanypa-ya.* Nyangka-tjananyarnanta *ngayulu nyinakitjamunu.* Ngarna-yan *kutjupa-kutjupa mulyatarrinytjanya nyakulalpi tililku tjunku.* Nyangka-tjanamparnanku *kalyparringkulalpi tirtu nyinama.*

<sup>13</sup> Yuwa, *watjala-tjananya parltjiltjaku-yanku palunyatjanu tjirntungka pitjala-ya ngayula ngaratjaku.* Tjiinya-ya *kutjupa-kutjupa mulyatarringsu ngayulu-tjananyarna watjarnu tilira tjunkutjaku.* Nyangka-tjananyarnanta *yirringkankukitjamunu.* Ngarna-yan *kutjupa-kutjupa ngurriralpi tililku tjunku.* Palunyangka-tjananyarnanta *puru yirringkanku.* Nyangka-yan *yanyan-yanyanpa nyinapayi pirninya pungkula wiyaliku.*

**14** *Yitjurayilku tjamupirti-tjananya watjala nyangka-yayi tjirntungka pitja yungarrapirti-yungarrapirti ngara. Nyangka-rna wati kutju nintitjunku.*

**15** *Nyangkalta-yan mirri pungkulalpi tililku tjunku puru katja yurntalpirti puru palunyaku yulytjatarra. Tjiinya-rna watjarnu wantingu kutjupa-kutjupa ngurra nyarra Tjarikanyamartatji-yan pampuntjamaaltu wantitjaku. Kurntangka! Ngayuku wangka kulirnu wantirralpi tungun-tunguntu mulyatarringu. Palunyangka-yan pirninyartu kunkanyarringu.”*

### *Yayikannga-ya Yaturnu Mirrirntanu*

**16-18** *Nyangka Tjatjuwanya munga-mungangka pakaralpi wati pirninya yarltingu kutjungkanu nyarra Mama Kuurrku puuka miirl-miirlta. Nyangkalta-ya pitjangu yungarrapirti-yungarrapirti ngaralanytja. Nyangka Mama Kuurrtu nintitjunu Yayikannga.*

**19** *Nyangka Tjatjuwalu-lu watjarnu, “Wiya Yayikan, tjurrkurltunku watjala Mama Kuurtunta kuliranyangka. Nyaapan mulyatarringu? Kumpitjunkutjamaaltu watjalanku yartakarra.”*

**20** *Nyangka Yayikantu watjarnu, “Yuwa, mularrpa-rna Mama Kuurrtta tungun-tungunarringu.*

**21-22** *Nyarra Tjarikala-rna nyangu kawutu walykumunu puru tjilpa kawurlpatarrarti ngarrirranyangka mukurringu mantjira katingu. Palunyalu-rna ngayuku tiintingka tjawarnu kumpitjunu wantingu.”*

Nyangka Tjatjuwalu wati-tjananya witurnu palunyaku tiintikutu. Nyangka-ya mularrpartu kukurraarnu tjawaralpi nyangu kawutu, kawurlpa puru tjilpatarrartu ngarirranyangka.

<sup>23</sup> Nyangka-ya yurrara marlakulu katingu puuka miirl-miirlta ngamu tjunu. Nyangka-ya pirlnu nyangu.

<sup>24</sup> Palunyatjanulu-ya Yayikannga tjulyalarpi palunyaku katja yurntalpirtitarrartu tjulyarnu. Palunyalu-ya kawutu puru kawurlpa, tjilpatarrartu puru tiinti, yulytja kutjupa-kutjupatarrartu mantjira katingu karlu-karru yini Kunkanyta tjunu. Palunyalu-ya palunyaku puluka, tungki, tji-iputarrartu tjirtira wanarayirnu palunyangkartu mawantingu.

<sup>25</sup> Nyangka Tjatjuwalu watjarnu, “Yuwa, nyuntulu-lanyatjun kunkanymanu. Nyangka Mama Kuurrtunta nyuntunya kunkanymanu.” Nyangka yarningu pirlnu-ya yapungka yaturayirnu mirrirntanu Yayikannga puru palunyaku katja yurntalpirtitarrartu. Palunyatjanu-tjananya tilirnu tjunu palunyaku yulytja pirlnyatarrartu.

<sup>26</sup> Palunyalu-ya yapu pirni yurrara katingu kutjungkarayirnu wantingu. Palunyalu-ya ngurra palunyanya tjapirnu yini Karlu-karru Kunkanyta.

Nyangka Mama Kuurrnga-tjanampa kalyparringu nyinarranyta.

*Yarnangu Yayinyamartatji-tjananya Pungu Wi-yarnu*

<sup>1</sup> Nyangka Mama Kuurrtu-lu Tjatjuwanya wat-jarnu, “Ngurlurringkutjamaalpa kururnpa rapa nyinama. Yuwa, warrmarlarringkula-yan yanku ngurra Yayilakutu. Nyangka-tjananyarnanta yir-ringkanku.

<sup>2</sup> Nyangka-yan yarnangu pirninya pungku wiyalipi ngurra tilikku tjarrpatjunku. Tjiinya-yan Tjarikanya tilirnu tjarrpatjunu, palunyapirinypa. Yuwa, ngaangkalpi-tjananyarnanta watjarnu kutjupa-kutjupa Tjarikanyamartatji-yan pampuntjamaaltu wantitjaku. Nyangka kuwarrinya-yankun kutjupa-kutjupa pirninya palya kanyilku puru yanamulpa pirninyatarrartu. Yuwa, yanku-yan yiwarlangka takulu kumpilku nyinaku palunyalu-tjananya tjulurrtjingalku.”

<sup>3-4</sup> Nyangka mularrpartu Tjatjuwalu-tjananya palunyaku warrmarlapirti tamarlmanu. Palunyalu warrmarla 30,000-pa pikaputjunta ngurrkarntaralpi-tjananya watjarnu, “Mungangka-yan yanku yiwarla Yayila takulu kumpiralpi nyinama.

<sup>5</sup> Nyangka warrmarla kutjupatjarranya-latju yanku yiwarlakutu ngamurriku. Nyangka-lanyatjuya wati Yayinyamartatjilu nyakulalpi pakalku pika pungkukitja. Nyangka-latju ngarnartu pinkurraara kukurraalku.

<sup>6</sup> Nyangkalta-ya kulilku, ‘Wiya, ngurlu-ya kukurraarnu tjiinya-ya ngaangkalpi kukurraarnu, palunyapirinypa.’ Palunyangka-lanyatjuya ngurlura wanalku tiwa-tiwalku.

<sup>7-8</sup> Nyangkalta-yan kumpira nyinarranytjatjanu pakara ngalyakukurraalku. Palunyalu-yan yiwarlangka tjarrparralpi tililku tjunku, tjiinya Mama Kuurrtu-tjananya yirringkaranyangka."

<sup>9</sup> Nyangka-ya mularrpartu yanu kumpirnu nyinarranytja yiwarlangka takulu.

<sup>10</sup> Nyangka Tjatjuwanya ngurrangka ngarringu tjirnturringkulalpi munga-mungangka pakarnu. Palunyalu warrmarla kutjupatjarranya yarlirratjananya walara katingu Yayilakutu.

<sup>11</sup> Nyangka-ya yiwarla wayirntara kayili kutipitjangu murrpungka ngurra tjunu. Palunyalu ngalyanyinarra yiwarlakutu nyakulanytja. Nyangka karru-karru ngurrrpa ngaralananytja.

<sup>14-15</sup> Nyangka puurrpa Yayinyamartatjilu nyangu Tjatjuwaku warrmarlapirti nyinarranyangka. Palunyalu-ya pakara waarrpungkula watipitjangu pika pungkukitja. Nyangka Tjatjuwanya-ya ngarnartu pinkurraara kukurraarnu yurirlku. Nyangka warrmarla kutjupatjarra-ya yiwarla kutjupanguru kumpirnu nyinarranytja pika pungkukitja. Nyangka puurrpa Yayinyamartatji ngurrrpa nyinarranytja.

<sup>16-17</sup> Tjiinya wati pirninya-tjananya yarltingu kutjungkaralpi watjarnu, "Waarrpungkulatjananyaaya wati pirninya ngurlura wanala." Nyangka mularrpartu-tjananyaaya waarrpungkula ngurlura wanarnu. Nyangka kutjupanya-ya yiwarlangka nyinanytjamunurtu. Tjiinya pirlurrtu-ya kayirrpaa yarla wantirra kukurraarnu. Palunyalu Tjatjuwanya-tjananya tiwa ngurlura wanarnu.

<sup>18</sup> Nyangka Mama Kuurrtu Tjatjuwanya

*watjarnu, “Kurlartanku katula kanyiralpi yiwarla Yayilakutu nintitjurra. Tjiinya-rnanta yirringkanku. Nyangka-yan yarnangu pirninya pungku wiyaliku.”*

<sup>19</sup> *Nyangka mularrpartu kurlarta keturnu kanyiranytja. Nyangka-ya warrmarla nyarra kumpirnu nyinarranytja, palunyanya-ya pakara watikuku-kukurraarnu yiwarlangka tjarrparralpi waarrpungu tilirnu tjunu.*

<sup>20-21</sup> *Nyangka-ya wati Yayinyamartatjilu marlakukulturalpi nyangu tjunarnpa purlkanya pakaranyangka. Nyangka Tjatjuwaku warrmarlalutarrartu-ya nyangu tjunarnpa purlkanya pakaranyangka. Tjiinya-ya nintilu kulirnu warrmarla nyarra kutjupanguru-ya nyinanytjatjanulu tjarrparralpi tilirnu. Palunyalu-ya pinkurraaralpi-tjananya wati Yayinyamartatji wakara mirrirntaranytja. Nyangka-ya purtu kulirnu kukurraalkitjalu.*

<sup>22</sup> *Nyangka-ya warrmarla Yitjurayilku wartangkatjalu tilirnu tjunkulalpi wantirra ngalyakukurraarnu lurrtjurringkulalpi-tjananya wakarayirnu-wakarayirnu wiyarnu yurirlkutjurnu.*

<sup>24</sup> *Nyangka-ya warrmarla Yitjurayilku tjamupirtlu-ya marlaku kutipitjangu yiwarlangka tjarrparralpi yarnangu kutjupatjarranya pungu mirrirntanu.*

<sup>25-26</sup> *Nyangka Tjatjuwalu kurlarta yiwarlakutu tirtu nintitjunkula kanyirayirnu, nyangka yarnangu pirninya Yayinyamartatji mirrirringu. Tjiinya-ya wati minyma 12,000-pa-ya mirrirringu tjirntu palunyangkartu.*

<sup>27</sup> Nyangka Yitjurayilku tjamupirtilu-yanku kutjupa-kutjupa pirni, yanamulpatarrartu mantjirnu kanyiranytja tjiinya Mama Kuurrtu Tjatjuwanya watjarnu wantinyangka.

## 9

*Wati Kipiyanngamartatjilu-ya Ngarnartu Mayurnu*

<sup>1-2</sup> Nyangka-ya puurrpa pirni nyarra kapi Tjutanta yapurra nyinarranytjalu kulirnu tjukur-  
rpa Yitjurayilku tjamupirtilu-ya yiwarla kut-  
jarra tilirnu tjarrpatjunkutja. Nyangka-ya  
lurrtju-lurrtjurringu Yitjurayilku tjamupirti pi-  
ka pungukitja.

<sup>3</sup> Parturtu-ya yarnangu kutjupa nyarra yiwarla Kipiyanngamartatjilu tjuma palunyanya kuliralpi

<sup>4-5</sup> tjumara watjaranytja Tjatjuwanya mayulkitjalu. Nyangka-ya wati marnkurr-  
marnkurrtu ngarnartu warntu yarlatjarra tjarrpatjunu puru tjinapuunpa yarlatjarra. Palunyatjanulu-ya nyamirli ngarnmanytjatja mantjirnu yakutjangka tjarrpatjura tungkingka tatira yanu.

<sup>6</sup> Palunyatjanu-ya pitjalayirnu nyangu Tjatjuwanya ngurrangka nyinarranyangka. Palunyalu-ya watjarnu, “Yuwa, ngurra tiwanguru-latju pitjangu. Nyangka-munta-lankun wangkarra kulikku palyarnkarralku pikamaalpa pukurlpa-lankun nyinakitjalu?”

<sup>7</sup> Nyangka-ya wati nyarra Yitjurayilku tjamupirtilu watjarnu, “Wiya, tjinguru-yan ngurra ngamungurutarrartu pitjangu. Tjiinya

*Mama Kuurrtu-lanyatju watjarnu yarnangu ngurra ngaangkatja lurrtjurringkula wangkarra kuliranytjamaaltu wantitjaku.”*

<sup>8</sup> *Nyangka-ya wati nyarra Kipiyanggamartatjilu Tjatjuwanya watjarnu, “Yuwa puurr, nyuntuku wangka-latju wangarnarralu kulira palyanma kutjupa-kutjupan watjaranyangka.”*

*Nyangka Tjatjuwalu-tjananya watjarnu, “Ngananya-yan? Ngurra wanytjanguru-yan pitjangu?”*

<sup>9</sup> *Nyangka-ya watjarnu, “Wiya puurr, ngurra tiwanguru-latju pitjangu. Kulirnu-latju tjukurrpa Mama Kuurrngatjarra. Puru-latju tjukurrpa kulirnu Mama Kuurrtu-tjanampanku ngurra Yiitjipula yayirnintjulu kutjupa-kutjupa palyaranyangka.*

<sup>10</sup> *Puru-latju kulirnu tjiinya Mama Kuurrtu-tjananyanta yirringkanu kapi Tjuutanta kakarrara. Nyangka-yan puurrpa kutjarra puru yarnangu pirninyartu pungu wiyarnu.*

<sup>11</sup> *Nyangka liita pirlili-lanyatju witurnu pitjala-latju nyuntunya-tjananyanta tjapiltjaku, ‘Palya-munta-lankun wangkarra kuliralpi palyarnkarralku pikamaalpa-lankun pukurlpa nyinakitjalu?’*

<sup>12-13</sup> *Tjiinya-latju ngurra tiwanguru pitjangu. Nyamirli ngaanya nyawa. Warungkatjalatju mantjiralpi yakutjangka tjarrpatjura katirrayirnu, nyangka ngarringu pikirringu. Nyawa-lampatju warntu tjinapuunpatarrartu. Walykumunu-latju tjarrpatjura pitjalayirnu nyangka yarlatjarrarringu yiwarra wirrimi-rangka.”*

**14-15** Nyangka-ya Yitjurayilku tjamupirti watatjarringu Mama Kuurrnga tjapilkitja. Tjinguru-ya Mama Kuurrnga tjapinma, "Palyamunta-latju palyarnkarralku wantiku wati ngaanya-tjananya pukurltu yirringkankukitjalu?" Nyangka Tjatjuwalu-tjananya watarrkulu palyarnkarrarnu wati maliki pirninya mirrirntankutjamaaltu wantikitjalu. Nyangka-ya liita pirlutarrartu palyarnkarrarnu pukurltu-tjananya yirringkankukitjalu. Nyangka-ya wati maliki ngurraku marlaku kutipitjangu.

**16** Nyangka ngurra kutjarratjanulu Yitjurayilku tjamupirti-ya kulirnu tjiiňya wati palunyanya-ya mularrpartu ngamu nyinarranytja.

**17** Palunyalu-ya pakara yanu wangkakitjatjananya. Marlawanalu-ya ma-wanarayirnu ngurra kutjarratjanu waalkarrarnu ngurra palunyangka-ya nyinarranyangka.

**18** Nyangka kutjupatjarralu-ya pikaku kuliranytja tjiiňya ngurra Kipiyangngamartatjinya-tjananya wakalkitjalu. Nyangka Tjatjuwalu-tjananya watjarnu, "Wiya, mirri pungkutjamaaltu-tjananya wanti. Tjiinya-lan Mama Kuurrta mirangka wangkarralpi palyarnkarrarnu pukurltu-tjananya yirringkankukitjalu."

Nyangka-ya yarningu pirninya mirrparn-mirrparnpa wangkarranytja.

**19** Parturtu liita pirlu-ya watjarnu, "Wiya, Mama Kuurrta mirangka-lan palyarnkarrarnu pukurltu-tjananya yirringkankukitjalu. Kamu-lan mirri pungku.

*20 Tjiinya-lan wartalpitjanu palyarnkarrarnu. Wanti-tjananya nyangka-yayi wanka nyinama. Tjiinya Mama Kuurrnga-lampa mirrparnarritjakutarra-la wanti.*

*21 Nyangka-lampaya tjimarri wiyalu waarka tirtu palyanma. Tjiinya-ya waru kartara katima, kapitarra tjutira katima.”*

*22 Nyangka Tjatjuwalu wati kutju witurnu liit-tjananya Kipiyangamartatji yarlirra katitjaku. Nyangka-tjananya mularrpartu yarlirra katingu. Nyangka-tjananya tjapirnu, “Nyaatjanulu-yan mayurnu watjarnu tiwanguru pitjanytjatjanulu? Nyuntulu-kulila-yan ngamu nyinarra.*

*23 Wiya, Mama Kuurrtu watjarnu waarka-yan tjimarri wiyalu palyaratjaku. Tjiinyamarntu-yan mayurnu watjarnu tiwanguru pitjanytjatjanulu. Palunyangka-yan waru katapungkula katima, kapitarrartu tjutira katima Mama Kuurrku tiinti miirl-miirlkutu.”*

*24 Nyangka-ya watjarnu, “Wiya, tjukuripa palyamunu-latju kulirnu ngurlu-ngurlurringkulalpi mayurnu. Tjiinya-latju ngurlurringu mirrirritjakutarra. Kulirnu-latju tjiinya Mama Kuurrtu watjarnu-lanyatju mirri pungkutjaku. Puru watjarnu ngurralampatjun ngurlunyparrara yungarrarringkula kanyiratjaku.*

*25 Yuwa, nyuntulu-ya yungarralu kulila. Yaaltjingalku-lanyatjun? Tjinguru-lanyatjun mirri pungku. Wiya-tjinguru-lanyatjun wanka kanyinma.”*

*26 Nyangka Tjatjuwalu-tjananya Yitjurayilku tjamupirti marrkurnu yarnangu*

*Kipiyanggamartatji-tjananya mirri pungkutjaku.*

<sup>27</sup> *Palunyatjanulu watjarnu yarnangu Kipiyantamartatji pirnilu-ya tjimarri wiyalu waarka tirtu palyaratjaku. Tjiinya-tjananya watjarnu waruya tirtu katapungkula katirratjaku puru-ya kapi tirtu tjutira katirratjaku Mama Kuurrku tiinti miirl-miirlkutu. Nyangka-ya palunyapirinypa tirtu palyara kuwarrinya-rna tjukurrpa ngaanya walkatjuranyangka.*

## 10

*Kunarta Purlkanyalu-tjananya Yaturayirnu Mirrirntanu*

<sup>1-5</sup> *Nyangka puurrpa pirnilu-ya kulirnu tjiinya Tjatjuwalu-ya yiwarla kutjarra tilirnu tjarrpatjunu. Palunyalu kulirnu yarnangu Kipiyanggamartatjilu-yanku puru Yitjurayilku tjamupirtilu wangkarralpi palyarnkarrarnu ngaparrku yirringkankukitjalu. Palunyalu-ya lurrtjurringu nyinarranytja.*

*Nyangka-ya lurrtjurringkulalpi warrmarlar-ringkula yanu. Pitjangu-ya yiwarla Kipiyanga parrangururrtjunu pika-tjananya wakalkitja.*

<sup>6</sup> *Nyangka-ya wati Kipiyanggamartatjilu wati kutju witurnu yankula Tjatjuwanya watjalt-jaku. Nyangka pitjangu watjarnu, "Wiya puurr, wirrtjala-lanyatju yirringkala. Tjiinya-ya puurrpa pirni warrmarlarringkula pitjangu pika-lanyatju wakara mirrirntankukitja. Wantinytjamaaltu-lanyatju wankakutu kanyila."*

<sup>7</sup> Nyangka Tjatjuwalu kuliralpi palunyaku warrmarla pirninya yarltingu kutjungkara pakara yanu wati Kipiyangngamartatji yirringkankukitja.

<sup>8</sup> Nyangka Mama Kuurrtu Tjatjuwala watjarnu, "Ngurlumaalpa raparringkula yarra ngayulu-tjananyarnanta miranykanyiranyangka. Nyangka-yan puurrpa pirniku warrmarla pirninyartu wakalku wiyalku."

<sup>9</sup> Nyangka Tjatjuwanya-ya pitjalayirnu mungangka tjulurrku waalkarrarnu.

<sup>10</sup> Nyangka Mama Kuurrtu-tjananya puurrpa pirniku warrmarla pina kuwar-kuwarmanu. Nyangka-ya kuwararrara parrakukurraaranytja. Nyangka-ya Yitjurayilku tjamupirtlu-tjananya ya-puwanalu ngurlura parrawanara wakara mirrirntaranytja.

<sup>11</sup> Nyangka-ya puurrpa pirniku warrmarla ngurlu kukurraarnu. Nyangka Mama Kuurrtu kunarta purlkanya wiyarnu. Nyangka-tjananya yatura mirrirntaranytja. Tjiinya Yitjurayilku tjamupirtlu-ya pirni-tjananya wakara mirrirntaranytja. Nyangka kunartalu-tjananya pirnipurlka yaturayirnu mirrirntanu, tjiinya-ya wakara mirrirntaranytja, palunyangka munkarra.

<sup>12</sup> Tjiinya tjirntu palunyangkartu Mama Kuurrtu-tjananya Yitjurayilku tjamupirti yirringkaranytja. Palunyangka-ya puurrpa pirniku warrmarla wakarayirnu mirrirntanu. Nyangka Tjatjuwalu Mama Kuurrnga tjapirnu yarnangu pirnilu-ya kuliranyangka. Tjiinya ngaapirinypa tjapirnu, "Yuwa Mama, tjirntu marrkula nyangkayi kutjungkartu ngara.

*Kirnaratarrartu marrkula.”*

<sup>13</sup> *Nyangka mularrpartu tjirntu kirnaratarrartu marrkurnu. Nyangka palunyangkartu ngaralayirnu nyangka-ya Yitjurayilku tjamupirtelu-tjananya wakarayirnu mirrirntanu. Nyangka tjirntu rawa ngaralayirnu ngulartu ma-tjarrpangu.*

<sup>14</sup> *Tjiinya Mama Kuurrtu palunyapirinypa kutjuwarra palyaranytjamunu. Palunyangkakutju wati kutjuku wangka kuliralpi tjirntu marrkurnu. Tjiinya Mama Kuurrtu-tjananya Yitjurayilku tjamupirti yayirninytjulu yirringkaranytja.*

<sup>15</sup> *Nyangka Tjatjuwanya palunyaku warrmarla pirninya-ya marlaku kutipitjangu ngurrangka nyinarranytja.*

## 23

*Tjatjuwanya Nyinarrayirnu Yirnarringu Mirririkitja Nyinarranytja*

<sup>1</sup> *Nyangka Mama Kuurrtu-tjananya Yitjurayilku tjamupirti yirringkaranytja. Nyangka-ya yarnangu kutjupa-kutjupa pirni pungu wiyalapi ngurrararringu. Palunyalu-ya pikamaalpa rawa nyinarrayirnu, nyangka Tjatjuwanya yirnarringu.*

<sup>2</sup> *Palunyalu-tjananya Yitjurayilku tjamupirtiku liita pirninya kutjungkaralpi watjarnu, “Yuwa, yirnarringkulalpi-rna wiyarrikitja nyinarra.*

<sup>3</sup> *Tjiinya-yan nyangu Mama Kuurrtu-lanya yayirninytjulu yirringkaranytja. Nyangka-yan yarnangu kutjupa-kutjupa pirninya pungu wi-yarnu.*

**4-5** Nyangka-ya yarnangu kutjupatjarranya tirtu nyinarra ngula-yan pungkula wiylatjaku. Tjiinya Mama Kuurrtu kalkurnu ngurra nyuntuku nintilkitalju. Nyangka-yan ngula pika pungkukitja yanku. Nyangka Mama Kuurrtu-tjananya ngurlura kukurrtjingalku. Nyangka-yan ngurrararriku nyinama.

**6** Kuliltjarralu-ya mularrkulinma tjiinya wangka pirninyartu Mawutjalu walkatjunu wantitjanya. Wangka pirninyartu-ya wangarnarralu kulira palyanma.”

**14** Nyangka Tjatjuwalu-tjananya tirtu watjara-wanarayintja, “Yuwa, ngayuku-tju ngamuntirringu tjiinya-rna wiyarringkutjaku. Nyangka-yan nintilu kulira tjiinya Mama Kuurrtu-lampa kutjupa-kutjupa walykumunu kalkuralpi nintirnu.

**15** Tjiinya Mama Kuurrtu-lanya kalkurnu wantitjatjanulu walykumunulu yirringkaranytja. Puru tjiinya mirri pungkukitjalu kalkuralpi tjurrkurltu mirri pungkupayi.”

**16** Nyangka-tjinguru-yan Mama Kuurrku wangka wantirralpi kutjupa pupakatirralpi marninypungku. Nyangka-tjanampanku Mama Kuurrnga mirrparnarriku. Palunyalutjananya wiylaku. Nyangka ngurra walykumunutjanu tjirturu-tjirturu purlkanya ngarama.”

## 24

*Tjatjuwalu-tjananya Mama Kuurrku Wangka Watjaranytja*

<sup>1</sup> Nyangka Tjatjuwalu-tjananya Yitjurayilku tjamupirti yarltingu pitjala-ya ngurra kutjungka lurrtjurringkutjaku. Nyangka-ya mularrpartu pitja-pitjangu. Nyangka Tjatjuwalu-tjananya watjarnu yirna pirninya-ya pitjala Mama Kuurrku tiinti miirl-miirlta ngaralatjaku. Nyangka-ya mularrpartu pitjangu ngaralanytja.

<sup>2</sup> Nyangka Tjatjuwalu-tjananya watjarnu, "Yuwa, Mama Kuurrtu ngaapirinypa watjarnu, 'Yuwa, kutjulpirtu nyuntuku-tjanampanku tjamu mirripirti-ya kakarrara nyinarranytja ngurra tiwangka. Palunyalu-yanku tjukurrtatja kutjupa-kutjupa pirni pupakatirra marninypungkulanytja. Tjiinya Yayipuramaku mamalutarrartu pupakatirra marninypungkulanytja.

<sup>3</sup> Tjiinya Yayipuramanya-tjanampanku kutjut-jamu nyinarranytja. Nyangka-rnalu ngurra ti-wanguru yarltirra katingu. Palunyalu manta Kayinanta ngurra lipiwanalu walara parrakatir-rayintja. Palunyalu-rnara katja kutju nintirnu yini Yayitjikinya. Tjiinya-yan Yayipuramalanguru yarnangu pirnirringu.

<sup>4</sup> Tjiinya Yayitjikiku-rna katja kutjarra nintirnu Tjayikapanya puru Yiitjunya. Nyangka Tjayikapa-nya palunyaku katja yurntalpirtitarrartu-ya yanu ngurra Yiitjipula nyinarranytja.

<sup>5-6</sup> Nyangka ngulartu-rna witurnu Mawutjalupula Yarantu nyuntuku-tjanampanku tjamupirti yirringkankutjaku. Palunyalu-rna Yiitjipula nyinapayi pirniku pika purlkanya yutirnu. Palunyalu-rna nyuntuku tjamupirti Yiitjipulanguru pakaltjingara walara katingu. Nyangka-ya yarnangu Yiitjipunyamartatjilu-

*tjananya wanarayintja purni kaarrtjarralu. Nyangka-ya nyuntuku-tjanampanku tjamupirti mapitjangu kapı Tjitirn-tjitirntakutu.*

<sup>7</sup> *Palunyalu-rniya mirrarra tjapiranytja ngayulu-rna yirringkankutjaku. Nyangka-rna ngururrkutjarra mungalurrrmanu tjiiinya warrmarlalu-tjananya nyakula pungkutjakutarra. Palunyalu-rna kapı wartutankulalpi manta tikirlmanu. Nyangka-ya nyuntuku tjamupirti wankartu mapitjalayintja. Nyangka-ya warrmarla Yiitjipunyamartatjilu-tjananya ngurlura wanarnu. Nyangka-rna kapı marlakunu. Nyangka Yiitjipunyamartatjilu-ya kapı kuurltjurayirnu mirriringu wiyyarringu. Tjiinya-yan tjukurrpa palunyaku ninti.'*

*Nyangka Mama Kuurrtu tirtu watjara-wanarayintja, 'Tjiinya-yan mayu-mayuwana parranyinarrayintja.*

<sup>8</sup> *Nyangka kurli pirnitjanulu-tjananyarnanta walara katingu ngurra nyarra Tjuutanta kakarrara, palunyalakutu. Nyangka-ya yarnangu kutjupa ngurra palunyangka nyinarranytja. Nyangka ngayulu-tjananyarnanta yirringkanu. Nyangka-yan yarnangu pirninya pungu wiyyarnu. Palunyatjanu-yan ngurrararringu nyinarranytja palunyaku-tjanampa ngurrangka.*

<sup>11</sup> *Palunyalu-yan kapı Tjuutannga kartanya-pungkula pitjangu Tjarikalakutu. Nyangka-ya wati Tjarikanyamartatjilu-tjananyantaya pika pungkulanytja. Nyangka ngayulu-tjananyarnanta yirringkaranytja. Nyangka-tjananyayan pungu wiyyarnu.*

<sup>12</sup> *Tjiinya-yan mapitjalayinnyangka-*

*ya yarnangu pirninya ngurlurringkula kukurraarnu. Tjinguru-yan kulira nyuntulu-yan kunmarnu purlkanyangka puru kurlartangka ngurlutjingarnu. Wiya, ngayulu-tjananyarnanta yirringkara ngurlutjingaranytja.*

<sup>13</sup> *Yuwa, nyuntulu-yan manta ngaanya tjawara yurninypa tjunkutjamunu. Ngayulu-tjanamparnanku manta mirrkatjarra nintirnu. Nyangka-yan kuwarrinya yiwarla yanyutjangka nyinarra. Tjiinya-yan yiwarla pirninya palyara tjunkutjamunu. Puru-yan warta mirrkatjarra tjunkula pakaltjingantjamunu. Tjiinya-yan mirrka yaipi puru kiripi warta yanyutjangkatja ngalkula.’ Palunyapirinypa Mama Kuurrtu watjarnu.”*

### *Yarnangu Pirnilu-ya Watjaranytja Mama Kuurrngakutju Wanalkitjalu*

<sup>14</sup> *Nyangka Tjatjuwalu-tjananya tirtu watjara-wanarayintja, “Yuwa, Mama Kuurrngakutju-ya wanana. Puru palunyaku wangka-ya wangarnarralu kulira palyanma. Tjiinya yapu pirni nyarra-yan pupakatirra marninypungkupayinya-ya warni wanti. Palunyalu-ya Mama Kuurrngakutju pupakatirra marninypungama.*

<sup>15</sup> *Tjinguru-yan kulira Mama Kuurrnga wankitjalu. Wiya, wanytjanya-yan wanalku? Tjinguru-yan yapu pirni nyarra tjamupirtelu-ya kanyiranytjanya wanana. Tjinguru-yan yapu pirni nyarra ngurra ngaangkatjalu-ya kanyiranytjanya wanana. Wiya, ngayulu-latjunku Mama Kuurrnga wanana, ngayuku yungarrapirtelu-latjunku.”*

<sup>16</sup> Nyangka-ya yarnangu pirlulu watjarnu, "Wiya, Mama Kuurrnga-latjunku wantik-itjamunu. Yapu kutjupa-kutjupa-latjunku pupakatirra marninypungkukitjamunu.

<sup>17</sup> Tjiinya-ya ngayuku-lampa mamalu waarka purlkanya palyaranytja ngurra Yiitjipula. Nyangka Mama Kuurrtu-lanyanta yayirninytjulu pakaltjingarnu. Palunyalu-lanyanta miranykanyira parrakatirrayintja ngurra kutjupa-kutjupawana.

<sup>18</sup> Nyangka-lan ngurra ngaaku pitjangu. Nyangka Mama Kuurrtu-tjananya yarnangu pirninya pungu wiyarnu. Nyangka-latju Mama Kuurrnga tirtu marninypungama. Tjiinya palunyanyakutju nyinarra ngayulu-lan pupakatirra marninypungkulatjaku."

<sup>19</sup> Nyangka Tjatjuwalu-tjananya watjarnu, "Wiya, pamparr-pamparrtu-yan watjarnu. Kuliltjarralu-yanku kulinma. Tjiinya Mama Kuurrnga tjukarurru nyinarra. Palunyalu watjarnu palunyanyakutju-la pupakatirra marninypungkulatjaku. Tjinguru-yan kutjupa pupakatiku marninypungku. Nyangka-tjanampanku mirrparnarringkulalpi kalyparrikitjamunu.

<sup>20</sup> Tjiinya Mama Kuurrtu-lanya walykumunulu miranykanyira kanyira. Wantiku-kurlu-yan. Tirtu-ya kulinma. Kutjupa-ya pupakatirra marninypungkutjamaaltu wanti. Tjinguru-yan palunyapirinpa palyalku. Nyangka Mama Kuurrtu wuyurrpa kutjuparringkulalpi-tjananya marninypungkukitjamunu."

<sup>21</sup> Nyangka yarnangu pirlulu-ya watjarnu,

*"Wiya, ngayulu-latju Mama Kuurrngakutju pupakatirra marninypungama."*

**23** Nyangka Tjatjuwalu-tjananya watjarnu, "Kutjupatjarralu-yanku yapu tirtu kanyira pupakatirra marninypungkukitjalu. Wiya, warni-ya wanti. Palunyalu kurru ntutarrartuya watjala Mama Kuurrngakutju wanalkitjalu."

**24** Nyangka-ya yarnangu pirnilu Tjatjuwanya watjarnu, "Wiya, ngayulu-latjunku Mama Kuurrngakutju pupakatirra marninypungama. Palunyalu-latju palunyaku wangka wangarnarralu kulira palyanma." Nyangka-ya mularrpartu yapu pirninya nyarra pupakatirra marninypungkutjatjanulu warningu wantingu.

**25-26** Nyangka Tjatjuwalu wangka pirni walkatjunu Mama Kuurrku ruulangka tjiinya-ya tirtu nyakula-wanaratjaku palunyalu kuliratjaku. Puru-tjananya watjarnu watiluya yapu purlkanya murrutjunku wantitjaku. Nyangka-ya mularrpartu murrutjunu Mama Kuurrku tiinti miirl-miirlta yitingka.

**27** Nyangka Tjatjuwalu-tjananya yarnangu pirninya watjarnu, "Tjiinya ngula-yan yapu ngaanya nyakulalpi ruukulinma tjiinya-yan watjarnu wantingu Mama Kuurrnga tirtu wanalkitjalu. Yapu ngaanya-ya nyakula kulinma Mama Kuurrnga-yan watarrkurringkula wantitjakutarra."

**28** Nyangka Tjatjuwalu-tjananya yarnangu pirninya ngurrakutu witurnu. Nyangka-ya ngurra yungarra-yungarrakutu kutipitjangu.

*Tjatjuwanya Mirrirringu*

*29 Nyangka Tjatjuwanya mirrirringu tjiinya kurli-ra 110-pa ngaralanyangka.*

*30 Palunyangka-ya tjurnutjunu yapu partangka yiwarlangka ngamu.*

*31 Nyangka-ya Yitjurayilku tjamupirti nyinarrayirnu Mama Kuurrku watatjarringu. Tjiinya Tjatjuwanya wanka nyinarranyangkalpi-ya Mama Kuurrnga tirtu pupakatirra marninypungkulanytja. Puru yirna pirninya-ya wanka nyinarranyangkalpi yarnangu pirniluya Mama Kuurrku wangka wangarnarralu kulira palyaranytja. Tjiinya-ya yirna pirnilu nyangu Mama Kuurrtu yayirninytjulu kutjupakutjupa palyaranytja. Nyangka Tjatjuwanya puru yirna pirninya-ya mirrirrinyangka Yitjurayilku tjamupirti-ya Mama Kuurrku watatjarringu.*

### *Tjawutjaku Mirri Tarrka-ya Yiitjipulanguru Katingu*

*32 Nyangka tjiinya-ya Yitjurayilku tjamupirtilu Tjawutjaku mirri tarrka Yiitjipulanguru katingu. Rawalu-ya parrakatirrayintja. Palunyalu-ya tjurnutjunu Tjayikapaku ngurrangka. Tjiinya kutjulpirtu Tjayikapalu tala 100-pa nintiralpi manta payipungu, ngurra palunyangkartu-ya tjurnutjunu.*

*Yuwa, palunya.*

**Mama Kuurrku Wangka**  
**The New Testament and Old Testament portions in**  
**the Ngaanyatjarra language of Central Australia**  
copyright © 2007 Bible Society of Australia

Language: Ngaanyatjarra

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-12

---

PDF generated using Haiola and XeLaTeX on 18 Apr 2025 from source files dated 31 Aug 2023

4a812de0-27c8-54bc-97ae-ba02cd95a5e5